

ՄԻ ՓԱՍՏԱԹՈՒՂԹ՝ ՈՐԴԱՆ ԿԱՐՄԻՐ ՆԵՐԿԻ ՄԱՍԻՆ

Միքայել Նալբանդյանը 1863 թվականի մայիսի 1-ին բանտից իր եղբորը՝ Ղազարոսին գրած մի նամակում խոսելով իր ընկերոջ՝ բժիշկ Անանիա Սուլթանշահի մասին, բնագիտական այլ հարցեր շոշափելու հետ մեկտեղ, խորհուրդ է տալիս Անանիային զբաղվելու նաև որդան կարմրի ուսումնասիրությամբ: Ահա թե ինչ է գրում նա. «Անանիայի ուշադրությունն եմ հրավիրում «Coccinella» ընտանիքի միջատների ուսումնասիրության վրա, չնայած հայտնի է, որ այդ միջատները գտնվում են «կակտուսի» ընտանիքի բույսերի վրա, այնուհանդերձ որդան կարմիրը կա և բազմանում է Հայաստանում, Արաքսի հովտում: Այդ միջատն առաջին անգամ հայտնաբերեց եպիսկոպոս-նկարիչ Սահակը սրանից 20—25 տարի առաջ, որի համար էլ ուսական կառավարության կողմից արժանացավ ցմահ թոշակի: Այդ եպիսկոպոսը մահացել է 50-ական թվականներին և նրանց (միջատների—Ս. Ա.) դադանիքը գերեզման տարել...» [5]:

Մատենադարանում, Մսեր Մսերյանի արխիվում պահպանված մի փաստաթղթում, գրված 1830 թվականին, որ վերնագրված է «Օրինակ կազմելոյ զկարմիր որդան կամ մեռուցման նորին», իբրև առաջաբան վերոհիշյալ Սահակ ծաղկարարը հետևյալն է ասում. «Կամելով իմ գտանել զկերպ յօրինման որդանն կարմրոյ՝ լանձն առի կրել զտաժանմունս ի պէս-պէս փորձառութեանս մեռուցման նորին և հանման իւղոյն՝ ըստ աւանդելոյ այլ և այլ անձանց սկսեալ ի 1815 ամէ փրկչական թուականին» [4]:

Ներկ ստանալու համար արված փորձերը երկու խմբի են բաժանվում. նախ՝ միջատի մեռցման և ապա՝ ներկի ստացման [6]: Փորձերից պարզվում է, որ ներկի որակը մեծ չափով կախված է միջատի մեռցման եղանակից, որի համար նա անում է 10 փորձ՝ եռացնում բացախի և զինու մեջ, փռում, շորացնում, ազդում ծծմբի անհիդրիդով, վրան ցանում կրի և ալյուրի փոշի և այլն...: Վերջապես կանգ է առնում կալաքարի (K_2CO_3) ջրում մեռցնելու վրա, որը անում է նփրեմ կաթողիկոս Զորագյուղցու խորհրդով: Միջատի մեռցման եղանակը որոշելուց հետո, անցնում է մյուս փուլին՝ ներկ ստանալուն, որի համար տալիս է երեք ձև.

1. Միջատը կալաքարի (պոտաշ) ջրում մեռցնելուց հետո, թողնել 24 ժամ սառը ջրի մեջ, ապա եռացնել շողանի (օճառախոտի Saponaria) ջրով, ավելացնել լուծր (արենախոտ Lythrum), շիբ, ջուրը քամել, շորացնել: Որդան կարմիր ներկի ստացման այս ձևին մենք հանդիպեցինք 1818 թվականին Էջմիածնում գրած՝ Մատենադարանի № 432 ձեռագրում ևս [3]:

2. Թմրած որդը (միջատը) դնել գինու մեջ, ստացված կարմրագույն հյութը քամել և շորացնել: Այս եղանակով ստացված ներկն ըստ ծաղկարարի ավելի գեղեցիկ ու պայծառափայլ է:

3. Միջատը ապակյա անոթում պահելուց հետո, եփել առաջին ձևով, օճառախոտի հետ, խառնելով արենախոտ և շիբ:

«Եւ այս է ահա՝ զոր ի գործ ածեմք ի կնիքս սրբազնասուրբ քահանայապետիս մերոյ և յայլ ամէն բազմատեսակ յերանգս նկարուց և ի ծաղկագիրս զանազան բղթոց (ընդդժումը մերն է — Ս. Ա.), որէ յայնմանէ (ի 1816 թականէն) մինչև յայսօր ի ժամանակի, ոչ կարոտացեալ յայնմհետէ այդքուդ զնոյն զնելոյ», — գրում է նա:

Ներկի ստացումից հետո, Սահակ ծաղկարարը ձեռնարկում է միջատի հավաքման աշխատանքներին: «Այս կենդանի ըստ պատմելոյ ոմանց դտանի յեզերս գետոյն Երասխայ սկսեալ ի Սարվսնլար ասացեալ տաճկսրնակ գեղջէ (որ է բացատ յաթոռոյս իբր կիսոյ աւուր ճանապարհսն) մինչև զմուտս մերձակայ սահմանացն Նախճաւանայ»:

1822 թվականից սկսած ծաղկարարը իր առջև խնդիր է դնում անձամբ լինել տեղերում և հավաքել միջատը: Նախ՝ դնում է խոր-վիրապ ու հավաքում: Այնուհետև ճշգրտելով տեղերը՝ կազմակերպում է միջատի մասսայական հավաք, ձեռքի տակ ունենալով 200 հոգի [1]: Իր զեկուցագրի մեջ հայտնում է, որ հավաքել է 3 փութ (48 կգ) շոր որդան կարմիր: Ինչպես միջատի հավաքման աշխատանքներին, նույնպես և միջատի կենսաբանության հետ կապված բոլոր հարցերին վերաբերող նյութերը նա գրի է առել իր հիշատակարանում, որը հրատարակված է մեր կողմից [2]:

Սահակ ծաղկարարի գործունեության հետ կապված հարուստ նյութերը պետք է հիմք դառնան ու նպաստեն որդան կարմրի հետազոտությունասիրության համար, որին ձեռնարկել է ՀՍՍՀ գիտությունների ակադեմիայի կենդանաբանության ինստիտուտը: Իսկ ներկի ստացման նրա առաջարկած ձևերը դրսևորում են նրան որպես քիմիկոսի, որը տքնաջան աշխատանքով պատմական որդան կարմրին հանեց մոռացությունից, դարձնելով արդիական:

Մ. Մաշտոցի անվան

Մատենադարան

Ստացված է 15.31 1973 թ.

С. Т. АВДАЛБЕГЯН

ДОКУМЕНТ О ПОЛУЧЕНИИ КРАСКИ «ВОРДАН КАРМИР»

Резюме

В XIX веке сбором «Армянской кошенили» и приготовлении из нее красок занимался Саак Цахкарар (Саак епископ Тер-Григорян, миниатюрист). В архиве Матенадарана сохранился документ, где подробно списываются способы умерщвления насекомого (Porphyrophora Hamelii Brandt) и получения из него красок разных оттенков. Документ датирован 1830 годом и принадлежит тому же Сааку Цахкарару: краски он употреблял для рисунков, акварелей, печатей и для оформления важных бумаг. Приведем один способ получения краски, предложенный

Сааком Цахкарамом. После умерщвления насекомых в растворе K_2CO_3 оставляют в воде 24 часа, затем кипятят в растворе мыльной (Sapona-
gia), прибавляют дербянника (Lythrum), квасцов, процеживают и вы-
сушивают.

Դ Ր Ա Կ Ա Ն Ո Ւ Թ Յ Ո Ւ Ն

1. Ավդալբեգյան Ս. Թ. Որդան կարմիրը և նրա տարածումը Արարատյան դաշտավայրում, «Տե-
ղեկագիր» ՀՍՍՀ ԳԱ (բիոլոգ. գիտ.) 7, 1962:
2. Ավդալբեգյան Ս. Թ. Սահակ եպիսկոպոս Տեր-Գրիգորյանի հիշատակարանը, «Էջմիածին»,
1963, Ա, Բ, Գ, Դ, 1964:
3. Հաբուսյունյան Ա. Խ. Ներկերի և թանաքների գործածությունը հին հայկական ձեռագրերում,
Երևան, 1941:
4. Մատենադարան, Մսեր Մսերյանի արխիվ, թղթ. 202, վավ. 461:
5. Նալբանդյան Մ. Երկերի լիակատար ժողովածու, Երևան, 4, 1949:
6. Казанджян Т. Т. Очерки по истории химии в Армении, Ереван, 1955.